

दे॒वता॒भ्यस्त॒दन्यथा॒ ततः॑ करोति यथो चान्या॒भ्यो दे॒वता॒भ्योऽथ॑ य॒दुच्य॑ति तदे॒-  
 वास्याभि॒षुतं॑ भवतीति ॥ ९ ॥ त॒डु हो॒वाच॑ या॒ज्ञवल्क्यः॑ । अ॒भ्येव॑ पु॒णुयान्न॑ सोम  
 इन्द्रम॒सुतो॑ ममाद् ना॒ब्रह्माणो॑ मघ॒वान॑ सुता॒स इत्य॑षिणाभ्य॒नूक्तं॑ न वाऽअन्य॒-  
 स्यै क॒स्यै च॒न दे॒वता॒यै सकृ॑दभिषुणोति त॒दन्यथा॒ ततः॑ करोति यथो चान्या॒भ्यो  
 दे॒वता॒भ्यस्त॒स्माद॒भ्येव॑ पु॒णुया॒दिति॑ ॥ १० ॥ तस्य द्वा॒दश॑ प्रथम॒गर्भाः॑ । प॒ष्ठौह्यो  
 दक्षिणा द्वा॒दश॑ वै मा॒साः संवत्स॒रस्य॑ संवत्स॒रः प्रजा॒पतिः॑ प्रजा॒पतिर॑ऽशुस्त॒देनं॑  
 प्रजा॒पतिं॑ करोति ॥ ११ ॥ ॥ शतम् २८०० ॥ ॥ ता॒सां द्वा॒दश॑ गर्भाः । ताश्चतुर्विंशति॒-  
 श्चतुर्विंशति॑र्वै संवत्स॒रस्यार्ध॑मा॒साः संवत्स॒रः प्रजा॒पतिः॑ प्रजा॒पतिर॑ऽशुस्त॒देनं॑ प्र॒-  
 जा॒पतिं॑ करोति ॥ १२ ॥ त॒डु ह॒ कौकू॑स्तः । चतुर्विंशतिमे॒वैताः॑ प्रथम॒गर्भाः॑ प॒ष्ठौ-  
 हीर्दक्षिणा द्वावृष॒भं पञ्च॑विंश॑ हिरण्यमेत॒डु ह॒ स॒ ददौ॑ ॥ १३ ॥ स वाऽएष  
 न सर्व॑स्येव ग्रहीत॒व्यः । आ॒त्मा ह्यस्यैष॒ यो न्वे॒व ज्ञा॒तस्त॒स्य ग्रही॑त॒व्यो यो वा॒-  
 स्य प्रि॒यः स्या॒द्यो वा॒नूचा॒नोऽनू॒क्तेनैनं॑ प्राप्नुयात् ॥ १४ ॥ सह॒स्रे ग्रही॑त॒व्यः । सर्वं॑  
 वै सह॒स्र॑ सर्व॑मेष॒ सर्व॑वेद॒से ग्रही॑त॒व्यः सर्वं॑ वै सर्व॑वेद॒स॑ सर्व॑मेष॒ विश्व॑जि॒ति  
 सर्व॑पृ॒ष्ठे ग्रही॑त॒व्यः सर्वं॑ वै विश्व॑जित्सर्व॒पृष्ठः॑ सर्व॑मेष॒ वाज॑पे॒ये राज॑सू॒ये ग्रही॑त॒व्यः  
 सर्व॑ऽहि तत्स॒न्ने ग्रही॑त॒व्यः सर्वं॑ वै स॒न्ने सर्व॑मेष॒ एता॑नि ग्र॒हणा॑नि ॥ १५ ॥  
 ब्राह्मणम् ॥ ३ [६. १.] ॥ ॥

एतं वाऽएते ग॒हन्ति॑ । षड्भिर्मा॒सैर्य॑ एष त॒पति॑ ये संवत्स॒रमा॑सते त॒डुच्य॑त  
 ऽएव॑ सामतो यथैत॒स्य त्रुपं॑ क्रिय॒तऽउच्य॑तऽऽक्तोऽथैत॒देव॑ यजु॒ष्टः पुर॑श्चरणतो य॒-  
 देतं॑ गृह्ण॒त्येते॒नोऽए॒वैनं॑ ग॒हन्ति॑ ॥ १ ॥ अथा॒तो गृह्ण॑त्येव । उ॒डु त्वं॑ ज्ञात॒वेद॑सं  
 दे॒वं व॒हन्ति॑ के॒तवः॑ । द॒शे वि॒श्वाय॑ सूर्यम् । उप॒याम॑गृहीतोऽसि सूर्याय॒ त्वा आ॒-  
 ज्ञायि॑ष॒ ते यो॒निः सूर्या॑य॒ त्वा आ॒ज्ञायि॑ति ॥ २ ॥ ब्राह्मणम् ॥ ४ [६. २.] ॥ ॥

अथा॒तः प॒ञ्चय॑नस्यैव । प॒ञ्चेका॑द॒शिन्यै॒वेया॑त्स॒ अग्नि॑यं प्रथमं पशुमा॒लभ॑तेऽथ